



19. august 2022

UKA 2022/56

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Ukioq 2025-imiit nutaamik umiarsuarmik sinersortaateqalernissaa siunertaralugu Naalackersuisut pilersaarummik suliaqarnissaannik Inatsisartut aalajangiiffigisassaattut siunnersuut, taamaasilluni pilersaarut kingusinnerpaamik UKA 2023-imi saqqummiunneqassaaq. (Inatsisartunut ilaasortaq Anders Olsen, Siumut)

Tunngavilersuut:

Nalungisatsituut maanna M/S Sarfaq Ittuk sinersortaatitut atorpoq. Sinersortaataasup maanna sapaatip akunnerata ataatsip ingerlanerani ingerlaarfigisarpaa Qaqortumiit Ilulissat tikillugu utimullu. Sinersortaat maanna ingerlaarsinnaassusaa takuneqarsinnaavoq 13 knob missaaniittoq aammalu 246-nik ilaasoqarsinnaasoq. Sinersortaat maanna atuuttoq eqqarsaatigalugu, tassalu Arctic Umiaq Linep 2025 ilanngullugu kiffartuussinnermut isumaqatigiissummut maanna atuuttumut sinaakkusiussat iluanni sinersorluni angalatitsinissaa naatsorsuutigineqarpoq.

Sinersortaateqarneq eqqarsaatigalugu piffissanngorsoraara nutaamik eqqarsarluni ineriartortitsinissaq aammalu ullutsinnut naleqqunnerusumik sinersortaateqalernissaq alloriarfigisariaqaleripput.

Nunatsinni mittarfissuussat nutaat ukiuni qaninnerni piviusunngortussaapput, taakkualu ilaatigut aamma siunertaraat takornarissat ullumikkumiit amerlanerungaartut tikittalernissaat. Innuttaasorpassuit aammalumi takornariarpassuit sinersorlutik nunarput takusassarsiorfigalugu periarfissaqartinneqarnissaat piviusunngortissallugu suliaqartariaqartugut ineriartortitsisariaqalertugullu isumaqarpunga.

Sinersortaat ullumikkut atuuttoq pisoqalivoq ullutsinnullu naleqqukkunnaarnikuulluni. Taamaammat sinersortaammik nutaamik aammalu sukkasuumik isumannaatsumillu ingerlaarsinnaassusilimmik peqalertariaqartoq isumaqarpunga, minnerunngitsumillu illoqarfiit maanna tikinneqarneq ajortut aamma tikinneqartalernissaat anguniarneqartariaqartoq isumaqarlunga.

Sinersortaat nutaaq uanga isumanni tunngaviusumik tassaasariaqarpoq ilaaffigalugu isumannaatsoq toqqissisimanartorlu. Sinersortaat nutaaq aamma tassaasariaqarpoq qavani Nanortalimmiit avannamut Uummannaq imaluunniit Upernavik angullugu sinersorsinnaasoq,



tamannalu nutaaliaasumik eqqarsarnikkut sapaatip akunnerata ataatsip iluani siumut utimullu aamma ingerlaarsinnaassuseqartuusariaqarluni.

Nunatsinni innuttaasorpassuit nunatta iluani angalaniarnikkut periarfissaasa annertusaaffiginissaat pingaaruteqartorujussuusoq isumaqarpunga. Taamaammat neriuutigaara siunnersuut manna tassaassasoq meeqqat, inuusuttut, inersimasut, utoqqaat, timersortartut allarpassuillu nunatta iluani angalaniarnikkut periarfissaasa pitsaasut ilassaat. Sinersorneq nutaaliaasoq tassaasariaqarpoq piffissami sivikinnerusumi inoqarfimmiit inoqarfimmut nikissinnaaneq aammalu illoqarfinnut amerlanerusunut aqqusaagaqarsinnaasoq, tamannalu nunatta pisariaqartilivissimagaa isumaqarpunga, taamaammat neriuutigaara siunnersuut manna partiinit Naalakkersuisuniillu taperserluarneqarumaartoq.

Pisortanut aningaasatigut allaffissornikkullu kingunerisassat:

Una aalajangiiffigisassatut siunnersuut Naalakkersuisut sulinerminnut atatillugu maannangaaq atorsaanerussamik aaqqiissuteqarnissaanut sammisuuvoq, suliassallu annerpaartaa suliffeqarfiup pineqartup pilersaarusiorsimaneranut tunngasussaasoq naatsorsuutigineqassaaq. Naalakkersuisut pilersaarummik suliaqarnissaat suliat ingerlareersut iluanni ingerlanneqassasoq naatsorsuutigaara, akisunerpaassaguni AC-p sisamararterutaanik naleqartussa.

Pilersaarutip suliarineqassaguni imarissavai pisortanut aningaasatigut allaffissornikkullu kinguneqaataasussat.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Naalakkersuisut MS Sarfaq Ittuup taarsernissaanut pilersaarummik suliaqareersimalerpata, siunissami ilaasunik assartuussinerup qanoq attaveqatigiinnikkut isikkoqarsinnaanera takorlooruminarnerulersussaassaaq.

Ilaasunik angallassinermut kiffartuussinissamik isumaqatigiissuteqartarnerit tungaasigut ingerlataqartunut aningaasatigut allaffissornikkullu kingunerisinnavai, ilaasunik angallassinerep imaatigut ingerlanerulerneratigut kiffartuussinissamik isumaqatigiissutit tamatuma kingunerisaanik allannortittariaqarsinnaassammata.

Suliffeqarfimmut pineqartumut ilaasoqarnerulernermit kinguneqassasoq naatsorsuutigineqarsinnaavoq, taamalu kaaviiaartitaqarnerulernermittaaq kinguneqassalluni, imaappoq sinersortaat sukkanerusoq ullutsinnullu naleqqunnerusoq atorneqalissappat. Suliffeqarfimmut kingunissai maannangaaq erseqqissumik naatsorsoruminaapput, apeqqutaasussallu ilagissavaat umiarsuaq qanoq akeqassanersoq, qanoq angaasalersorneqassanersoq, ukiut qassit nalikilliliineq ingerlanneqassanersoq il.il.



Innuttaasunut aningaasatigut kingunerisassai:

Pilersaarutip qularnaassavaa kiffartuussinissamut isumaqatigiissut ukioq 2025-imi unippat, innuttaasut angallannerusinnaanissaannut periarfissat qanoq ikkumaarnissaat.

Pilersaarusiornikkullu innuttaasut takusassinneqassapput ukioq 2025-p kingorna sinersorluni umiarsuarmik angalaneq qanoq isikkoqarumaarsinnaanersoq.

Umiarsuaq nutaaliaaneq, sukkaneeq ilaasoqarnerusinnaasorlu atorneqalersinnaappat, suliffeqarfiullu kaaviiartitaanut annertusaataalluni pisinnaappat, naatsorsuutigineqassaaq angalaneq innuttaasunut akikinnerulersinnaasoq. Aamma angalanermi atukkat toqqissisimanartut mutiusullu innuttaasunut takornarianullu neqeroorutigineqarsinnaanngussasut.

(Nutsigaavoq – paatsuungasoqartillugu kalaallisoortaa atorneqartassaaq)